

JAIRUS' TANU

Jairus tanu' sihna thu hongki kohtak ciangin, Topa Jesu in Jairus tungah, "Lau kei inla, upna nei in," (Mk 5:36) ci hi. Numeino gei ah hong dingin, Topa in, "Numeino aw, nang tungah thu kahong pia hi, tho in," (Mk 5:41) acih ciangin, tua numeino in leitungsihna pan in, leitung nuntakna athak in khat vei ngahkik hi. Tua numeino hongtho in, lamhongpai hi.

Tua numeino banghang thoto sakin, banghang lampai sak hiam? Tua numeino ii nuntakna piakik ziau leh kingah lo ding hiam? Tua numeino hongthawhkik nading in bangin nasem hiam? Tua numeino in tua bang thupha lianpi asantheih nading in bangsem hiam? Hih thute i ngaihsut ciangin, hih Laisiangtho in alamdang mahmah thuthuk honghilh hi cih i mu thei hi.

St. Jerome in hih Laisiangtho khiatna honggen na ah, "Topa in numeino aw kei min vangliat nadingin tho in. Banghanghiam cih leh na damna pen nangma thalawhzawhthu hilo in, thupha hangbek ahihi, acih na ahihi," (*Homily on the Gospel according to Mark, 5*) ci-in, honghilh hi. Hih thu hangin numei no thosak a, lam apaisakna thu i tel thei hi. Pasion thupha asang te in, ei ma thalawh zawhthu, eima han ciam zawhthu hilo in, thupha hehpihna hangbek in hong kipia ahih manin, Topa ading in tho khia in, Topa adingin mite muhna ah lampai khiading hi cihna ahihi.

Tua numeino ii nuntak na piakik ziau leh kingah lo hiam i cih ciangin, Pasion ading in kingah lo hi ici zawbehlap dinghi. Banghanghiam i cih ciangin, Pasion nuntakna sungah, huih diik liamlam beka nungta, lungnuntaka nungta, bangmah semlo a nungta, cih omlo hi. Pasion sungah anungta mite khempeuh in, Pasion deihna bang asem mite ahi uhhi. Tua thu hangin, tua numeino ii nuntakna hu bek napia kikziau lo in, thokhiasak in, lampaisak hi. Pasion in atawntung in nungta in, atawntungin itna na asem Pa ahihi. Tua hi a, numeino tungah

Topa bawl vangliatna in, Pasion sungah anungta ding mite ii nuntak zia lim honglak khol ahihi.

Tua numeino hongthawhkik nadingin bangin nasem hiam? Apa Jairus upna in nakpi takin nasem hi. Topa Jesu in Jairus kiangah, lunghimawh kei in, upna nei peuh in ci-in, khauhtak in tha na pia a, Jairus zong Topa kammal tungah lungkimna leh muanna lianpi tawh na umtentan in, asisa aki ci, atanu omna lupmun ciangdong Topa napai pih hi. Mite in bangci muh hiam? “Siapa gimsak nawn kei in,” (Mk 5: 22-35) ci uh hi. Banghangin hibangin ci uh hiam i cih ciangin, khatna ah, Jairus ading angaihsutsak na uh ahihi. Anih na ah, leitung ah sihna in anunung pen hi a, kuamah in tua kantan in nasem theilo hi cih ngaihsutna aneih man uh ahihi.

Lamkhatpan gen le hang, mihingte septheih, mihing te ngaih suttheih ciangbek mu in, thei uh ahih manin, tuabangin agen uh ahihi. Topa in tuathu mu in thei ahih manin, mihingte ngaihsutna in Pasion mai leh, Pasion vangliatna nuai ah bang mah mannei lo a, aman nei khat bek om in, tua in, mihingte ngaihsut theihloh, septheihloh, telzawhloh, batzawh ngeiloh Pasion vangliat na pen upna tawh sansiamna bek ahihi cih thu honglah na ahihi.

Tua hi a, Pasion tung upna i cih in, ngaihsutna abeiciang, cihnang theihnawnloh ciang, mihing ngaihsutna tha abei ciang, lametna abei ciang, mannei nawnlo i kisak ciang, i muhna, i zak na, i theihna, i tel nate in leitung thu le la te nuai ah sila bangin hong bawlhun ciang, Pasion in nakhempeuh semthei hi, kei zong honggum hi, kei hong it hi, hongnusia ngeilo hi cih muantentan na ahihi. Tua ahih manin, i pu i pate hang ahizong in, i nu i pate hang ahi zong in, Pasion thupha asang eite in Jairus tanu bangin tho in, Christu Topa mai-ah ama minthan nadingin lampai khia ni. Christian mimal eite in Jairus tanu ihihi.